



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Assad pezübenbuba Syrian tir asütsü tenangzüktepba agiogo

Assam Budget 2021-22: FINER-i pelaa agizüker, Congress-i aitsür



VOL. XVIII NO. 274 (ADOK 274) DIMAPUR

AMUNGNÜ (SUNDAY)

CHITENI (JULY) 18, 2021

₹ 5.00

HSLC aser HSSLC result atema temetetsü

Dimapur, July 17, 2021 (TYO): July 20, 2021 nung HSLC aser HSSLC Examinations 2021 indang results adoktsü dak sendakba osang kar tanü Nagaland Board of School Education (NBSE)-i metetdaksüogo.

HSLC aser HSSLC Examinations 2021 indang results tsünglanglen agüja aliba ama angutsü.

A. INTERNET:

1. www.nbsenl.edu.in
2. www.nbsenagaland.com
3. www.indiaresults.com
4. www.results.shiksha
5. www.schools9.com
6. www.exametc.com
7. www.jagranjosh.com

Marks/marksheet download asütsü atema:

- (a) www.nbsenl.edu.in
- (b) www.indiaresults.com
- (c) www.results.shiksha

B SMS:

- Agüja aliba ama zülur SMS ajanga results metetsü akok:
1. HSLC (Class 10) Examination 2021
SMS - NB10<space>ROLL NUMBER to 56070
HSSLC (Class 12)

Examination 2021

SMS - NB12<space>ROLL NUMBER to 56070

C. Android Mobile App -

<https://play.google.com/store/apps/details?id=nbse.results.shiksha>

D. PRINTED FORM:

NBSE-i Marksheets/Pass Certificates den külemi reju ajak nem Result Gazettes agütsütsü.

July 28, 2021 nungi dang Centre Superintendents nem documents agütsütsü aser parnoki agizükba sülen school tem nem lema agütsütsü. Centre Superintendent kar marutetsüsa kümra, Centre Superintendent ka nem authorization letter agütsütsü akok, ta NBSE-i metetdaksüogo.

Iba mapa ya district lemsar inyaktü aser NBSE portal www.nbsenl.edu.in aser district Whatsapp groups nung iba osang lemsateptsü. Anungji Centre Superintendent ajaki anogo lemsükba nung arua agizüktsü mepishir, ta parnokisa ashi.

NBSE indang portal www.nbsenl.edu.in nungsa Standard Operating Procedures (SOP) ajak angutsü.

COVID-19 Nagaland: 100 dak putet, 60 taneptsü angu, 5 asü

Kohima, July 17, 2021 (TYO): Deobarnü Nagaland nung nisung 100 dak COVID-19 aliba putet aser nisung 5 asü.

"Tanü nisung 100 dak COVID-19 putet. Parnokji Dimapur nung 36, Kohima nung 25, Mokokchung nung 12, Wokha nung 8, Peren nung 5, Phek o Tuensang nung pezüzü (4), Longleng nung 3, Kiphire nung 2 aser Mon nung 1 lir. Parnok züngsema nisung 26,576 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Maneni tanü COVID-19 puteta alir nisung 60 tashi taneptsü angu. Parnokji Mokokchung nung 23, Tuensang nung 13, Kohima nung 9, Dimapur nung 6, Peren nung 5, Phek nung 2 aser Kiphire o Mon nung kaka (1) lir. Parnok züngsema nisung 24,205 tashi taneptsü nguogo" ta paisa metetdaksü.

Nagaland nung taneptsü angur 91.08% lir aser tang nisung 1,112 anepaludar, ta paisa shisem.

Deobarnü COVID-19 puteta alir nisung 5 asü. Dimapur o

Kohima nung anana (2) aser Mokokchung nung ka asü. Parnok züngsema tasür ajak agi 524 kümogo saka nisung 14 bo tanga tashidak ajanga asü, ta Dr Kikon-isa ashi.

Nagaland nung COVID-19 alitsü akok ta temolung melemi bilemba sample 2,45,476 tendang. RT-PCR ajanga 1,00,442, TrueNat ajanga 64,908 aser Rapid Antigen Test ajanga 80,126 tendang, ta paisa ashi.

"Hokolbar tashi nung nisung 5,45,732 nem COVID-19 vaccine indang dose 6,60,283 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 60,480, healthcare professionals 15,882, arishi küm 45 ser temapur 1,70,103 aser arishi küm 18 nungi 44 tsüngda alir 2,99,267 lir, ta paisa ashi.

"Vaccine agirtem rongnungi nisung 1,14,551-i dose anaprong agiogo. Parnokji frontline workers 34,669, healthcare workers 11,606, arishi küm 45 ser temapur 66,126 aser arishi küm 18 nungi 44 tsüngda alir 150 lir" ta Dr Thurr-isa ashi.

Vaccine magir mesüra negative test report magütsür nem itasen magütsütsü

Dimapur, July 17, 2021 (TYO): Nagaland Civil Secretariat aser Directorate tem nung mapa inyaker ajaki High Powered Committee on COVID-19-i teletetba agiba sülen anidaksü metetdaksür ta state sorkari ashi.

Nagaland Civil Secretariat aser Directorate tem nung inyaker ajaki vaccine agütsüla mesüra anogo 15 shia COVID-19 negative test report agütsütsüla, ta sorkari ashi.

July 31, 2021 nungi COVID-19 vaccine indang dose ka danga magir mesüra COVID-19 negative test report magütsüba sorkar mapa inyaker tem nem itasen magütsütsü aser parnok office-ia marudaksütsü. Parnok office-i maruba mapangji 'leave without pay' ama züngshitsü, sorkarisa metetdaksüogo.

Iba tetuyuba ya Administrative Head of Departments / Head of

Departments ajanga inyaktü aser parnoki ita shia anogo 15 matongdang Home Department nem osang tejangja sangoktsütsü.

AHOD aser HOD temi vaccine mesüra COVID-19 negative test report agütsüba indang osang ashitsü aser iba nung ajemdaker tashi mangartem indang itasen sottsü mesüra 'leave without pay' maparen inyaktü, ta Nagaland state sorkari ashi.

Nagaland nung Unlock-3 atema SOP tasen metetdaksür

Kohima, July 17, 2021 (TYO): Nagaland nung Deobar nungi tenzüker August 1 tashi Unlock-3 alitsü.

Iba atema Honibarnü Nagaland Chief Secretary J Alam-i SOPs tasentem latetba osang metetdaksüogo.

Unlock-3 mapang July 26 nungi college tem lapoktsü melar aser iba atema tesayurtem aser non-teaching staff ajaki vaccine indang dose anaprong mesüra kabo agir asütsüla. Dose ka dang agirtemjia anogo 15 bo süir asütsüla aser Home Department-i agütsüba SOP sülen anidaksüla, ta Chief Secretary-i ashi.

Kasa inyakyim nung August 2 nungi Class 11 aser 12 atema school tem lapoktsü melar ta tanü Chief Secretary-i ashi, saka yashi HPC on COVID-19 atema sorkar otongdartemibo July 26 nungi higher secondary school tem lapoktsü melar ta metetdaksüogo.

July 26, 2021 nungisa in-house skill development institutes/ establishments nung nisung 50 tashi lapoktsü melar. Ajisiüaka, college tem dang tuyuba ama trainers, assistants aser non-teaching staff-i vaccine agir asütsüla.

Kilung nung nisung 50 aser kima nung nisung 100 tashi adenshia lokti sentongtem agütsü melar saka mapang ajak nung COVID-19 inyakyim aser SOPs beshitsüla, ta Nagaland chief secretary-isa metetdaksüogo.

Restaurant tem nung nisung 50% melar saka attendants/staff ajaki temalen shia aliba ama vaccine agir asütsüla, ta paisa ashi.

District Task Force ajaki tensa ajurura micro-containment zones tesentem shimtsü tetuyuba agütsür ta Chief Secretary-isa ashi.

DISTRICT BALALA TSÜNGDASENZÜRTEM:

Nagaland kübok district balala tsüngda gari tila ajanga senzütsü melar saka driver dena passenger dakshirangba yimya malitsüla aser COVID-19 vaccine indang dose anaprong mesüra kabosa agir asütsüla. Vaccine indang dose kaji anogo 15 jelia agiba asütsüla.

Gari tesülen nisung ana den tema mamentsü aser driver o passenger ajaki COVID-19 inyakyim beshitsüla, ta Chief Secretary-i ashi.

Vaccine indang dose anaprong magirtem mesüra anogo 15 majunger kar kodamasü senzütsüsa kümra District Task Force nungi temelaba balaka meshitsü akok.

TANGALENNUNGI ARURTEM:

Tangalen nungi Nagaland-i arurtem ajak COVID-19 tendangtsü.

Agüja aliba Points of Entry (PoE) nung Screening Test asütsü:

- a. Dimapur Airport
- b. Dimapur Railway Station-haltage of only long distance trains
- c. Dimapur- New Field Check Gate and Dillai Gate
- d. Kohima- Khuzama
- e. Mokokchung- Tsutapela and Watiyongpang
- f. Mon- Naginimora & Tizit
- g. Wokha- Bhandari
- h. Phek- Lanye Junction & Akash Bridge

Tangalen nungi arur ajak dak shirangba yimya malitsüla aser COVID-19 Vaccination Completion Certificate alitsüla. Parnok ket nung COVID-19 vaccination 1 (first) dose agiba aser ano 1 dose agir anogo 15 (ten) süiba Provisional certificate, mesüra AX-NHPSMS nungi

anguba SMS alitsüla.

COVID-19 vaccine indang dose anaprong agirtem dakbo COVID-19 metendangtsü aser quarantine masütsü. Maneni, mezüngbuba dose agir anogo 15 stürtem dak Point of Entry nung metendangtsü saka parnok anogo tenetnü (7) quarantine asütsü.

North East (NE) state nungi nisung kar gari lenmang/train ajanga Nagaland-i arura aser tanga state-i aoba passenger ka süra, pa/la ket nung Nagaland-i marudang ghonda 72 jelia tendangba Negative COVID-19 Test Result mesüra COVID-19 Vaccination Completion Certificate mesüra Provisional certificate alitsüla.

Military/ Para Military nisung kar Nagaland-i arura Military/Para Military formations units-i PoE nung teinyaktütem inyaktü aser pei pei camps units-i anir ao COVID-19 tendangtsü aser anogo 7 quarantine asütsü, ta Chief Secretary-isa ashi.

DTF lenisüba kübok Village Councils/Urban Local Bodies-i pei pei telongtet nung tangalen nungi arurtem jangjatsü aser parnok ket nung Certificate melira, Sub-divisional Task Force mesüra DTF nem osang sangoktsütsü.

Village Councils/Urban Local Bodies-isa tangalen nungi arurtem Quarantine mesüra COVID-19 inyakyim sülen anidakba reprangtsü aser tim masüba ajiteta Sub-Divisional Task Force mesüra DTF nem osang sangoktsütsü.

Iba Standard Operating Procedure (SOP) ya state ajungalen kasa dang amshitsü aser District Task Force, Urban Local Bodies, Village Authorities mesüra lokti tentet shingia melenshia amshitsü memelar, ta Nagaland Chief Secretary-isa metetdaksü.

Covid putetaka meshirangertem pei kidang takdang balaka nung mongdaksür, idangji -



Tir Yimiyim

Pei alidak aser ayipdak mopong aittsüsa kichiba (window & ventilation) lapoka yuang.
 Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.
 Pei meyong mobile phone, kumesü aser toothbrush nunger ama melentepa tamshi.
 Mozü achitsü agüja lira, aji shitak chiang.
 Tango junga mesashitba, teku ashiba, aketba aser temang metaba timtem lira yakta doctor bushiang.



TSM aser TNYF na DGP den senden ka amen



Dimapur, Chiteni/July 17 (TYO): Tzurangkong Senso Mungdang aser Tzurangkong Naga Youth Front na July 15 nü DGP Nagaland T.J. Longkumer IPS, Commissioner of Nagaland Rovilatou Mor, IGP (NPTO) Imlisunep IPS, DIG (Border) Vidalalie Zashumo IPS, DIG (IR) North Sendongmeren IPS, SP Mokochung, ADC Mangkolemba aser Border Magistrate, Merangmen den Tzurangkong nung senden ka menogo.

Nagaland aser Assam na tsungda arrtsü dak sendakba nung mangatetep adoker aliba

tajungtiba nung bentetsü atema lenmang bushitsü nukjindong nung iba senden ayongzüka amen.

Tzurangkong nung lokti tentet anaprongla yagi senden nung dena aliba ketdangsurtem nem parnok timtem tekangshi metetdakja liasü. DGP Nagaland-i, nangzükteper aliba ama arrtsü nung tetuyubatem maneni benoka inyaksangshitsü aser state anatsülen nungi ali atsünga aoba nokdangtsü atema takaratiba nung security force peria yoktsü department sentong aliba metetdaktsü. Paisa, CM jenjang nung Nagaland aser Assam na

senden ka yakta amentsü sentong yanglur lir ta shia nüburttem dang süngjemshitsü aser state ana tsungda rarabangsen memenatsü ayongzüko.

Ken o kanga junga asadanga jembishinüba sülen TSM aser TNYF-i state sorkar dang, arrtsü nung mangatetep aliba tekaratiba nung bentetsü aser Naga nung ali atsünga aruba nokdangtsü atema security tali yoktsü takhangba agütsü. Maneni parnoki state ana nung alirtem tesunep nung alitsü atema administration nem takok tashi teyari agütsütsü ketdangsurtem dang nangzü.

NBSE-i August 4 nü NSEE-i ayongzüka agitsü

Dimapur, Chiteni/July 17 (TYO): Nagaland sorkar tetuyuba dak ajemdaker Nagaland board of School Education-i sangdong ka ajanga offline mode nung August 4 nü Nagaland State Entrance Examination (NSEE) 2021 agitsü ta metetdaktsüo.

Nagaland State Entrance Examination (NSEE) 2021 candidates temi meteta alitsüba onük kar NBSE-i lemsatepogo.

1. Nagaland State Entrance Examination (NSEE) 2021 centre tem Kohima aser Dimapur nung lemkütsütsü.
2. Examination centre tem ya candidate temi shimba ama Kohima mesera Dimapur nung lemkütsütsü. Centre melenshitsü makoktsü.
3. Dimapur aser Kohima nung NSEE 2021 centre temji:

A. Kohima Examination Centres:

1. Rüzühkhrise GHSS, Kohima

2. Baptist High, Kohima
3. Mezhür HSS, Kohima
4. Ministers' Hill Baptist HSS, Kohima
5. Bethel HSS, Kohima
6. Grace HSS, Kohima

B. Dimapur Examination Centres:

1. GHSS Dimapur
 2. Greenwood School, Dimapur
 3. Christian HSS, Dimapur
 4. Don Bosco HSS Dimapur
 5. Little Star HSS Dimapur
- NSEE 2021 atema Admit Card tem July 29 nü nungi Board indang portal nbsenl.edu.in ajanga download asütsü maangka agütsütsü. Osang tejangja mapang tatsüka lir agütsütsü.
4. NSEE 2021 ghonda ana dang agitsü.
 5. Tatidang agütsürtemi tasüngdangba 120 dang langzütsü aser tasüngdangba shia mark 4 asütsü. (Chemistry, Physics, Botany & Zoology nungi tasüngdangba 30)
 6. Tasüngdangba ajak

Multiple Choice Questions (MCQs) asütsü.

7. NSEE ya August 4 nü 10:00 ako nungi 12 ako tashi agitsü.
8. Tasüngdangba ajak Core Curriculum/Syllabus (science stream) dak ajemdaker asüngdangtsü. NSEE atema Syllabus majemshitsü.
9. NSEE 2021 agiba mapang Nagaland sorkari agütsüba SOPs ajak benoktsü aser tatidang agiba mapang Covid dak sendakba yimayimpong ajak shidak beshitsüla.
10. Admit cards download asütsü atema, tatidang taa agütsütsü asoshi account number tem amala tongtibang osangtem mapang tatsüka lir Board indang portal nbsenl.edu.in nung upload sütsütsü. Candidate temi portal semdanga tenügdakba maparentem tembanga inyaktü nungdaker.



July 17 nü Covid 19, Kohima District Task Force (DTF)-i ayongzüka Bamboo Hall, Kisama nung Jakhama sub-division atema COVID-19 tashidak tendangba aser vaccine agiba dak sendakba nung sentong ka agiba mapang Minister for PWD (Mechanical & Housing) Tongpang Ozukum-i o jembiba noksa nung angur. urban development and municipal affairs Advisor, Dr. Neikiesalie Nicky Kire-a iba sentong nung dena liasü.

Osang teyazü prokshiba atema nisung ka apu

Dimapur, Chiteni/July 17 (TYO): Social media nung osang teyazü/olulu osang prokshiba atema Wokha Women Police-i July 14 nü tetsür ka puogo.

Aija alila yagi July 11 nü meinprongsü aketba shiranger noksa ka den voice message ka lemsatep aser ashiba agi, shirangsang ya COVID-19 vaccine agiba sülen yamai aküm. Iba noksa aser voice message ya ayimsünga prokshia ao aser iba ajanga nüburttem mangmangdaksü, kechiyong lai Covid-19 vaccine dak sendakba nung tashishitsü aketba noksa lemsatepba den osang teyazü prokshi.

Police temi ken o kanga junga bushisüngdangba sülen iba osang ya teyazü aser COVID-19 vaccine agiba dak

kecha sendaka mali, ta ngutet. Iba ken o dak sendakba nung tetsür ka puogo aser Wokha Women Police Station nung la anema ken o ka benokogo.

Wokha Police-i mapang shidak nung jenjang tapet agia aibelena alir apuba atema ADC, Wokha, Lankonsen Tsanglao-i parnok nem tenüngsang agütsüo aser nüburttem dang osang teyazü aser olulu osang prokshiba nungi pilaa alitsü aser ken o kar jangjanüa lira District Helpline Number-9863663885 nem osang tejangja agütsütsü mepeshia metetdaktsüo. Paisa, tang ama tensa majungba mapang ka nung ketdangsurtem nem teyari agütsütsü nüburttem ayongzüka den nüburttem kümzüka toktsütsü asoshi sorkari takok tashi inyakdar ta ashi.

MD Arobic Remedies & Pharmaceuticals-i tenla agütsü



July 17 nü EAC, Bendang Longkumer aser DPRO Dimapur, Lolano Patton na matsüngdang ADC Dimapur, Atokhe-i, Arobic Remedies and Pharmaceuticals company MD, Leena ket nungi mozü agizükba noksa nung angur.

Dimapur, Chiteni/July 17 (TYO): Maharashtra nung amenoker aliba Arobic Remedies & Pharmaceuticals company Managing Director, Leena Damgadde-i, Dimapur district kübok sensaker aser nungdaka aliba nisungtem nem lemtsütsü atema sen lakh 3 alang mozü tenla agütsüo.

District administration tenüng nung ADC Dimapur Atokhe-i July 17 nü Police mess Chumukedima nung mozütem agizükogo. Mozütem rongnung Antiallergy, Iron, Liver Tonic, multivitamins, calcium supplement, pain killer, acidity,

temang meta shirangba mapang achiba aser mashisa aliba tetsürtem atema mozü tem densema liasü.

ADC-i, district administration aser Dimapur nung aliba nüburttem tenüng nung tenla agütsür dang kanga pelaba lemsatepogo aser iba ajanga nungdaka alibapurttem nem teyari tulu agütsütsü, ta ashi.

Tenla agütsür Leena, shiba ADGP (IPS) Sandeep Damgadde kinungtsü lir, lai mozütem Nagaland kübok kinük nung aliba district tema tonga aotsüla, ta ashi.

Mozü agizükba mapang EAC, Bendang aser DPRO Dimapur nata densema liasü.

July 19 nü AHoD aser HoD senden atema weblink lemsatepogo

Dimapur, Chiteni/July 17 (TYO): Administrative Heads of Departments aser Heads of Departments senden ka July 19 nü 1:00 ako nungi tenzüka Secretariat Conference Hall, Kohima nung amentsü. Iba senden nung <http://meet.google.com/rrt-dwcv-qhx> ajanga virtually shilem agitettsü.

Senden nung district tem nung office tekolaktem aser staff tem indang attendance, officers/ staff densema directorates aser secretariat nung vaccine agiba jenjang, 03/08/2021 nungi tenzüka Nagaland Legislative Assembly

session tibuba agitsü aliba, Nagaland Rules of Executive Business, 2020- Adherence thereof, department aser directorate temi teti atema mesera terms & condition balala nung legal advisors/ consultants/ retainership shimba aser department balala indang email aser tanga contact detail tem sorkar indang websites nung update asütsü atema onüktem benoka sensak asemtsü.

AHoDs aser HoDs tem ajak iba senden nung tamakok maludaktsüi jangrabangra adentsü mepeshia metetdaktsüo.

Assam Budget 2021-22: FINER-i pelaa agizüker, Congress-i aitsür



Assam finance minister Ajanta Neog-i Assam Budget 2021-22 zünga metetdaksüba noksa nung angur.

Guwahati, July 17, 2021 (Agencies): Hokolbarnü Assam finance minister Ajanta Neog-i benokba Assam Budget 2021-22 pelashishia agizüker ta Federation of Industry and Commerce of North Eastern Region (FINER)-i metetdaksüogo.

"Assam Budget ya tax-free lir aser tax magii Rs 1.07 lakh crore indang lir. Iba Budget ya nübortem asoshi lir" ta FINER president Pabitra Buragohain-i ashi.

"Iba Budget nung Assam nung alirtemi tang timtem ajuruba tebilemstütem indang enoksema lir aser ano tarutsü asoshi infrastructure renloksü shia lir. Budget nung aliba ama mapa kuma inyakra, rongsenketzüng kanga ajungkettsü" ta FINER president-isa metetdaksü.

Assam sorkari nisung lakh 1 nem mapa agütsütsüba, Assam nung tzümetsüng khuret agientsüba, süngo lu nung mapa inyakerkem nem teyari agütsütsüba atema tenüngsang agütsür, ta paisa ashi.

Assam nung aliba handloom sectors nung yangluba 100% cotton fabric ajanga school uniforms yanglura, iba ajanga rural weavers ajangzüksü, ta Buragohain-isa ashi.

Budget nungsa fishery sector atema sen aika enoka lir aser

iba ajanga village community tanks 10,000 yanglutsü. Iba ajanga küm nung anogo 50,000 MT tashi mesütetsü, ta paisa ashi.

Assam sorkarisa agriculture commission tentetsü lemtetba pelashishia agizüker. Iba ajanga Assam nung mamatzü, entsü aser ak shi peria anepalutetsü, ta Buragohain-isa ashi.

Covid ajanga timtem ajuruba shishilemar tilatem aser artisians nem Rs. 10,000 agütsüba aser ano COVID ajanga tsüraburtem asüba lajar shia nem ita nung Rs.3500 agütsüba ya pelashishia agizüker, ta paisa metetdaksü.

Külen, Assam Congress president Ripun Bora-ibo Budget 2021-22 nung timtemba nisungtem atema tasen kecha mali ta metetdaksüogo.

"Centre nungi senotsü arutsü saka wara ajanga Assam nung tax bendenba nung tetsükdaksü ajuruogo. Anungji budget nung tax arutsü ta ashibaji mangutsü aser mapa meinyaktetsü" ta Ripun Bora-i ashi.

"Sorkari itasen nung Rs. 56,000 crores endokba den ano nisung lakh 1 nem itasen agütsüra tanga mapatem kechi agi inyaksü?" ta paisa asüngdang.

2016 küm Tarun Gogoi'er sorkar aliba mapang nung Rs 35,000 crores apuba liasü aser

iba nung asür CM Hiteswar Saikia aser CM Prafulla Mahanta na inyakba kümsüktem nung apuba sen densema liasü, ta paisa ashi.

"Saka BJP sorkari tesüiba küm 5 tsüngda Rs 47,000 crores apuogo aser iba ajanga sentsüh Rs 82,000 crores kümogo" ta Bora-isa shisem.

Assam sorkari teti atema inyaksüba women empowerment schemes kecha meinyak aser Budget nunga enoksema mali. Sorkari tetsürtem ashioktsür kechiyong micro-finance loans magien, ta Bora-isa metetdaksü.

Assam Accord Department nem Rs 2.7 crore dang lemzüksüba ajanga state sorkari Assam Accord indang tebilemstü khuret atema mebilemstüba sayur, ta paisa ashi.

Budget nung petrol- diesel-cooking gas aser mozütem jenjang atuba azüoktsü indang kecha shia mali, ta Bora-i ashi.

"Assam nung zünger mapa mangur nisung lakh 38 nem masü saka lakh 1 nem mapa agütsüba mapa tila ka dang lir. Budget nungsa venture schools aser colleges provincialisation asütsüba meinok aser ano health aser tanga department tem nung contract workers regularization indang shia mali. Iba ya nisungtem ashioktsüba budget ka lir" ta paisa metetdaksü.

Assam Secretariat nungi MLA indang gari auya

Guwahati, July 17, 2021 (Agencies): Assam Secretariat nung security maparen tim mestii inyakba ajanga MLA Phani Bhushan Choudhury indang gari auyar ao.

Choudhury ya Bongaigaon nungi kümsük tiben inyakba MLA ka lir aser campus nungi pa indang gari auya.

Auertemi auyar aoba Innova gari Numaligarh tesem nung lendong atalokba sülen ang iba osang jungkai adok.

"Iba ken o dak sendakba nung Dispur Police-i nisung asem puogo. Parnokji Harez Ali, Safiqul Ahmed aser Ariful Ali nungtem lir" ta Dispur Police Station nung

second Officer-in-Charge, Jugananda Boro-i ashi.

Ajisüaka, Phani Bhushan Choudhury-ibo Secretariat nung pa indang auyar mao ta ashi.

"Secretariat nungi kü indang gari ka danga auyar mao. Iba osang ya kong nungi adok'ar ni memetet" ta pai osangbener dang ashi.

Iba gari ya Choudhury indangbo masü saka pa nungdak nung amshi, ta Assistant Commissioner of Police (ACP), Dispur Himangshu Das-ia metetdaksü.

"Gari auyar aoba nung driver-i shilem agi ama temolung malemer" ta ACP-isa ashi.

Mizoram nung tanur 127 dena nisung 483 dak COVID-19 putet

Aizawl, July 17, 2021 (Agencies): Honibarnü Mizoram nung tanur 127 dena nisung 483 dak Covid19 aliba putetogo. Parnokk züngsema nisung ajak agi 26,690 kümogo.

Honibarnü Mizoram nung Covid19 puteta alir ka asü aser iba nisung züngsema tastir ajak agi 120 kümogo.

Ghonda 24 tsüngda samples 5,026 tendangba nung 483 dak COVID-19 aliba puteta liasü, ta ketdangsur kati ashi.

Mizoram nung tang nisung

5,741 dak Covid19 puteta anepaludar aser nisung 20,829 taneptsü nguogo.

Covid19 agi shirangba nungi taneptsü angurji 78% lir aser death rate 0.44% lir.

Honibar tashi nung Mizoram nung sample 5.51 lakh nung Covid19 tendangogo.

"Hokolbar tashi nung nisung lakh 6 nem vaccine agütsüogo aser iba nungi nisung lakh 1.2 temai dose anaprong agiogo" ta state immunisation officer, Dr. Lalzawmi-i ashi.



Assam kübok Udalguri district nung Sashastra Seema Bal (SSB) indang 37 Battalion-i telungpur pezü apu aser parnok ket nungi hand-made Single Barrel Breach Loading (SBBL) guns 3 anguba noksa nung angur. SSB sepaitemi par pezü den prangpongtem Dimakuchi Police ket nung agütsüogo. (Udalguri, July 17)

Imphal nung ZUF (K) züngsem 4 apu



Imphal, July 17, 2021 (Agencies): Manipur police-i Imphal East district nung Zeliangrong United Front (Kamsö) züngsem pezü apu.

Lisopur telungpurtem aliba osang tejangja ka angazükba sülen Imphal east district police aser police commandos telok kati New Chekkon nung mita ao. Iba mapang parnoki ZUF (K) telungpur pezüji apu.

Police-isa parnok ket nungi prangpongtem apu, ta Imphal

east SP N. Herojit-i ashi.

Telungpurtem jagi railway construction company tem aser NH 2 nung senzüba garitem dang nungi tashiyim agi sen saru. Telungpur pezüji D. Golmei, G Ruangmei, J. Golmei aser Makindin Golmei nung ta jangjaogo.

Parnok dang asüngdangya asüandang Noney nung tesem ka nung prangpong-injangtem miima ayuba ashi.

Iba osang nung ajemdaker

police commandos aser 10 Assam Rifles jawan temi Noney district nung mita aodang HK 33 rifle den magazine, RPG launcher 2 aser self-loading rifle ka ngutet, ta Herojit-isa metetdaksü.

Ano, Hokolbar aonung Imphal west district police commandos-i Singjamei nung Kanglei Yawol Kunna Lup (KYKL) züngsen ka apu.

Iba nisung ya Joyson Abonmei ta jangjaogo.

KOMA SÜLA TELANGZÜBA

Q. Naga yimten tebilemstü ya tang amai tatembang kuma melatettet, ano, küm ter süi nunga koma süla ?

(Tapak 6 nungi...)

Naga nung nuchiso monguteti küm terji süiyongjia Naga nungeri aremzüksüla kichiba süra maremzüki matateti aritepa India kapoksa alitsü pangjemtep nungbo Naga nungeri k?m noklang junga nüjiso bushiba ajakji amajok dang akümtsü.

-Sms

Nuchiso bushirtem ya dang amai lemsar pie pie tepilemba dang India den nuchiso atema jimpiba yagi kodanga tatembang metongtetsü, kichiba süra telok karibo teka metonga India küpoksa alitsü jempitsü akok aser karibo 1951 nung meyongnum agüja aliba ama ochi shia jempitsü akok anungji telok ajak longjemer India den mejempitetra ano küm terji ang masü tali aotsü akok.

-WhatsApp

Asenok Naga nung atemabo lenmang aisü nung yakta tembangadokba tajungba ta bilemer, saka karibo kodanga tamtembangi marudaktsütsüba ang tasa atonger ama. Asenok Naga nung tasü tait ochishir lenir nungdaker.

-SMS

Naga yimten tebilemstü ya tangang masü saka joko küm aika tatembang kati maruteti Government of India den jembia arudaki, ya ano küm 10 dang masü kümsa aika süiaka asen Naga nungeri aginüba ama telemetba tajung ka dangi marutsü südi na ta bilemer.

-SMS MKG

Naga yimtenji koba teloki angutsü? Küm 10 ji masü küm 20 lira mangutsü! Tema tazütsü agi jembia sayur dang. Pei atepzüng nung mener independent otsü jembiba jagi kodanga telemtetba ka dangi marutsü. Ceasefire ji dang meshipet meshi nokdangang!! Sadoksadoka alitsü lenmang bushir telok ati!!!

-SMS

Nagaland yimten tebilemstü ta melenshitsu aji ta mesüra tang asenok shisatsü ya ki dangbo küm ter tema süi nunga tajungbabo masütsü. Amen



TIR YIMYIM YIMOBILEM (EDITORIAL)

DIMAPUR AMUNGNÜ, CHITENI (JULY) 18, 2021

Ochiba Iartem

Alima nung asenok meimchirtem ya asenoksasa asenok sünütsüsüa alitsü makoker, kechiyong asenok madak ain tashi aketba kibur ana lir. Kibur kaji, asen yanglusang Yihovah Tsüngrem aser tangabaji kibur masü ser nung asenok madak kibur küma alitsü merangba Satan, asenok külaoktsüsang lir. Anungji, asenok alima nung ali tashi kibur ana rongnung ya ka mesüra ka tenzüksü. Iba jagiang, Yisua asenok dang Mathi 6:24 nung, nisung shingaia kibur ana metenzüktettsü ta ashiba angur. Aji oda, kibur ana rongnungji shiba tenzükner, tetezü shiba lar mesüra shiba kilir süner, aji asenok mulung, asenoki shimtsü. Iba kasa tangatetba nung, Yihusua-ia Israel nungertem dang, nenoki Yihovah Tsüngrem tenzüksü asü mesüra tanga tsüngrem tenzüksü, aji nenok mulung, nenoki shimtetang saka "ni aser ozü kibongbo Yihovah Tsüngrem Kibubasa tenzüksü," ta ashiba asenoki Yihusua 24:15 nung shia aliba angur. Kodang asenoki Yisu Khrista asenok menen asoshi asü ta memeteti liasü, asenok Satan, temenen, lar liasü, anungji asenok mulungjang nung tajung inyaksü bilemaka meinyaktet. Iba mapang asenoki asenoksasa asen shi azü aser tebang temeli azüoka linür saka mazüoktetter ta asen taküm agi asensasa asen nümamedangteti lia aru, kechiaser asen taküm nung asen mulung masü saka Satan kibursang mulung liasü. Ibaji angatettsü atema, asenok dang tenyar Paul-i Rom 7 nung ni' kechi meinyakner aser aser ni' kechi sempar, itemji dang ni' inyaker alir, kechiyong aji kü dak aliba temenen satani inyaker ta shia angur. Asenokia asen taküm nung tajung inyaker saka ma ta tamajung inyaker alir ta asüba ya süngmanga bilema alitsü. Alima nung, shitakba shidi süra, shibaibo tamajung inyaker, saka tajung dangbo tamajung tuluba inyaker alir aser tajung inyakerter dangbo tamajung inyaker kanga agia teimba angur. Ibaji asensasa inyaker masü saka asen taküm nung kiburi inyaker. Aji oda, asen taküm nung temenen Satan kibur sädaktsü tashi pai mulungba ama tamajung aser temenen mapa dang inyaksü. Ajisüaka, Yisu Khristai asenok temenen nung alar süa aliba tesamatsüba tia nungi kümzüksü asoshi Pa taküm bendanga agütsüba ajanga, Tsüngremi asenok temenen Satan kübok alar süa aliba tia nungi salatsü aser nüchi kümtsü, anungji asenok tangbo temenen lar masü saka Khrista nung taküm tasen kümogo ta Rom tapu 6 nung shia angur. Ajisüaka, Satan kübok alar liasüba tia nungi nüchi akümüji, joko, tangbo asen inyaknüsü inyaksü ta masü saka asenok alarbo alarsa mesüra kilirbo kilirsa asütsü. Tetezü, Satan kübok alar süa liasüba nungi Tsüngremi taochi agi asenok salatsübaji kibur melenba mapa ka dang lir, anungji joko tangbo asen taküm nung Kibur aser Kümtetdabaji Yisu Khrista asütsü. Iba jagiang, temenen satan talenba nungi salaba ajanga asenok ochiba lar akümer ta Rom 6:18 nung shia angur. Anungji, joko asenok taküm nung kechi shitak aser kechi ochi (righteous), item ochi mapatemji dang inyaksü. Aji oda, temenen talenba nungi salarji, joko asen inyaknüsü inyaksü ta masü saka asenji asensasa Ochiba lar kümer ochimashi mapa meinyaksü. Joko, tangbo asenoki tangar ajaki majung aser ochimashi mapa inyakba ngur inyaknüa bilemyonga meinyaksü, tangar shi azü jangrabalen janratema senzüya ngur asena senzünüa bilemyonga mesenzütsü, tangar pei chinütsü aser pei jemnüsü chiajema janratema aliba ngur, asena parnok amaji linüyonga malitsü, tangari asenok mezüngmeshiba marem asenokia mezüngmeshia inyaknüyonga meinyaksü, kechiyong, joko, asen taküm madak asen kibur masü, anungji asenok mulung masü saka Kibur Yisu Khrista mulung lir. Asenok Tsüngremi Pa taochi agi asen temenen aser maksü mapatem nungi nüchi küma anitetba sülen, asenok taküm aser jakla yimya indangindanga ochishia alitsüba ya asen mulungba masü saka Tsüngremi mulungba, anungji asenoki Pai mulungba inyaksübaji asenok mapa lir. Atangji, asenok temenen nung alidangbo asenoki tajung inyaknüa bilemyonga meinyaktet, azüoka linüyonga melitet, saka tangbo asenok tajung inyaksü bilemba ama tajung tuluka inyaktettsü aser aseni asen taküm meraketa litettsüa azüoktettsü, kechiyong tangbo asen taküm nung kibur melenogo aser kibur tasenbaji Yisu Khrista lir. Atangji, Ochiba kiburi mulungba ama alitsüba takümüji temelaba masü, ibaji alima nung anogo shia raraba tongpang asütsü, item tongpang akoker ajak nem Kiburi sempet yuja lir ta tenyar Paul-isa Timoti dang ashiba asenoki 2 Timoti 4 nung angur. Sempet lira yangji tongpang rara aser tetoktetpa ka lir, sempetji angati masü, ibajibo peisasa aazüktsü. Iba tongpangji, anogo shia, ochimashiba lima nung ochishia alitsü merangba tongpang rara asütsü, anungji ochimashiba lima nung ochishia litetba purtemi iba sempetji ajangzüktsü.

OLEMSABANG

YOUTH DIRECTOR TASENBA ARUOGO

- Maong Jamir

Jila Arogo ka nung Youth Director ka shimtsü asoshi lemtet. Youth Director shimtsü asoshi Arogo Yindi mungdang nung tasadangba yamai lateta yutsü:

- Pa recognized College ka nung BD mesüra M.Th. azünger asütsüla.
- Pa kenten tajung asütsüla, kokra Note shia alir shimtsü.
- Kibong maküm aser tebur asütsüla
- Khrista akaba asütsüla.

Iba tasadangba nung ajemdaker shimtsü asoshi committee ka shim. Mapang tatsüka lir committee pur ajaki par kinunger, yimer, tsükong tenüngtem bener aru. Committee purtem tsüngda parnoki bener aruba nisung 5 rongnung shiba shimtsü memeteti kanga mangmangtep, kechiba süra parnok ajaki pei bener aruba nisungji dang shimdaksünü.

Talangka tekolok mangmangtepba jembiteper Wapong Merenba Youth Director inyadaksütsü asoshi shimtet. Arogoi lazüka yutsüba tasadangba ajak pai tongtet. Pa kanga tokolok techira asünung M.Th. mezüng menden nung takok anguba nisung ka liasü. Pa kentenmenü nung onsara tajung aser Note kanga junga shia liasü. Aser tema tereprangtsü aser jembishinü nung pa Khrista akaba nübu tajung ka liasü.

Merenba küm tatsüka tenzükdang, pa indang shitakba sentsüji adok. Pa dak tashimaitemji itemi liasü:

- Lanurtem tsüngda tejak repranga mapa inyak.
- Külem toklang tenzükertem den meputepteter.
- Lanurtem den meputepteter.
- Lanur tebilemstütem mangateter.
- Pai mulungba dang inyaksü meranger.
- Ajemalu mali; kümli tatsü.
- Tangar atsüzüktsütsü shisatsü keta lir.
- Tangar dang junger ta meshitetba jakla ka liasü.
- Anungdang 10 am meta nunga saker.
- Sodi tali agir.

Arogo nung mepelai aküm aser küm ishika tsüngda iba Arogo nung lanurtem jenti tanela sama. Lanurtem arogo nung shilem agitsü mejangra. Youth Director masü, "Youth dictar" ta nemnema jemb. Arogo tebilemstütem asoshi pa/la shim, saka pa/laji arogo asoshi tebilemstü akümer. Süra Arogoi lateta yutsüba tasadangba dak ajemdaker shim masü no? Süra, koba nung Arogoi aibelen?

Tanü asen nüburtem tangatetbaji

- Ken junga tenra... Youth Director
- O Junga jembira... Pastor (Tetsür Pastor dena)
- Tetsür ka o tanep agi jembira... Child Director.

Tangatettsü

Asenoki meteta alitsübaji ya; Degree, kentenba, o nanga, junga jembibaji 'sempet ter rongnung ka'. Pa/la dak iba sempet keter tanga sempet tuko-ji (9ji) melira; pa/la ajanga loktiji rajang kümdaktsütsü. Ken junga metentetaka nisung ka dak tanga sempet tuko aliba ajanga lanurtem tejakleni aniba Youth Director-a lir, Tsüngrem-O tsüngro songa mejembiaka pa/la dak tanga sempet tuko aliba ajanga Arogo tejakleni aniba Arogoa lir.

Tenzüker shiba kechi mapa nung shimdir shimang, tebushir committee-i kanga dang professional süa shimtsüla:

- Yisu Khrista tajangja akaba
- Pei taküm azüoka tatishitsü taküm ka litetba
- Tangar, aser külem tenzüker den amalitepa inyaktetba
- Rongsen, konang bushiba nisung masütsüla
- Tila kümtetba
- Tangar nungdak metetba and timtem touthi nung külemi noktakba
- Mapa tasen asateta arok ajungtsü asoshi inyakba
- Tangari temelenshi tajungshi o pela agizüktetba
- Meranga inyakba - zülutsü, jembitsü aser mapa tasen inyaksü merangba
- Degree aser sempet akaba

Arogo tejakleni taküm aser tanela rangpen liromedema aintsü asoshi tenzüker shimba nung asen Arogotemi khen junga shisadangtsü nungdaker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Canada nung Tenla ki 17 rongdoktsü aser aika raksatsü



June 29, 2021 nü British Columbia, Canada nung aliba Sacred Heart Arogo Tenla ki rongdokba mapang tangokba noksa nung angur.

July 17, 2021: Tawa Canada nung lisopurtem aliba tesem nung Tenla ki aika rongdoktsüogo aser Tenla ki aika knga mejungi raksatsüogo.

Canada nung taoba mapang Tenla kitem aser Arogoi ketdangsuba residential schools nung lisopur tanurtem 1,000 jungnüa aremba leper anguba sülen Tenla ki 45 maakogo aser iba nungjagi Tenla ki 17 bo rongdoktsü mesüra kanga mejungi raksatsü.

Item Tenla ki timbaka Roman Catholic Arogotem indang lir.

Lisopur lenirtemibo Tenla ki amakba anenang, ta mepishiogo. Taoba hopta osangbenertem senden ka nung jembidang Living Waters Arogo nung assistant Pentecostal minister, Jenn Allan-Riley-i, Tenla kitem rongdoktsübaji lisopurtem dak mapet, ta metetdaksü.

Laisa, "Ni ashiba ama onoki nürburtem indang tekülem kitem meraksatsür. Tenla kitem rongdoktsüba ajanga tejashi aser mangyimertem atema

tejashi taliba bendenloksür," ta ashi.

Canada kübok province trok aser Northwest territories nung Tenla kitem rongdoktsüba mesüra amakba sülen Royal Canadian Mounted Police (RCMP)-i bushitsüngdang tenzükogo.

Taoba hopta Calgary nung aliba House of Prayer Alliance Arogo Tenla ki-a rongdoktsüogo, saka iba Arogo yabo Catholic Arogo masü. Iba Arogo nung züngsemtem timbaka southeast Asia nungi refugee tem lir.

Hombarnü interview ka nung jembidang iba Arogo nung pastor, Thai Nguyen-i, "Onok refugees lir. Yangi onok sadoksadoka alitsü atema onok Vietnam nungi jena aru, aser iba linük ya tajung ta onoki bilema liasü, ajisüaka tang ozü Arogo dak yamai atalokogo," ta ashi.

"Vietnam den medemdangra Canada ya tamajungba asütsüa akok, ta tangbo onoki bilemer," ta pastor-isa metetdaksü.

1800s tatembanglen Canada sorkar aser Arogoi ketdangsuba

residential school temi lisopur tanurtem/lanurtem nem tesayuba agütsütsü atema longjemer inyaka liasü, aser linük nung tesüsabuba residential school ji 1996 küm shibanga liasü.

Tan ita tetenzüklen-a Canada Day anogomong nung Alberta nung Tenla ki ter raksaja liasü, aser ibaji akhidang lisopurtem nem tim temeden magütsüba agi lisopurtemi tejashi nung raksatsüba asütsüa akok, ta police-i bilemer.

Canada nung akhidang Arogoi ketdangsuba residential school tem nung lisopur tanurtem aika aremba leper anguba sülen telok karibo July 1 nü Canada Day amongtsü aliba sentong thinentüsü, ta takhangba agüja liasü.

May ita nung Canada kübok British Columbia nung residential school tulutiba nung lisopur tanur 215 tasü mang aremba leper ka anguba sülen sülen maneni Canada nungsa Catholic residential school ka nung nisung 752 aremba osang jangjaogo.

Pastor James McConnell mapang talangka shirangba sülen süogo


July 17, 2021: Evangelical Khristan sayutsüngir nüngtugu, Pastor James McConnell mapang talangka shiranga aruba sülen alima nungi pilaogo; pa arrshi küm 84 liasü.

Honibarnep (July 17) Whitewell Metropolitan Tabernacle Arogoi Facebook video post ka ajanga pastor James asüba osang metetdaksü.

McConnell-i north Belfast Arogo ya tenteta liasü aser pa iba Arogo nung küm 60 dak tema lenir liasü.

Facebook nung video post ka ajanga Pastor David Purse-i, pai tejashi tulu nung pastor McConnell asüba osang sangdonger, ta metetdaksü.

"Pa hospital nung hopta tenet shi monga liasü. Onoki pa kanga junga meteta liasü aser pa kanga meima liasü, ibayongji hospital



Pastor James McConnell

mapang nung parnok atema sarasademtsüra onoki kanga pelatsü," ta pastor-isa mepishia metetdaksü.

2015 küm ken o ka angadanga mapang nung court kati, McConnell-i Islam yimsü anema mejembi, ta obendanga agüja liasü.

Pastor James McConnell-i küm aika sayutsüngia aruogo aser tanübo par Arogo nung züngsem aika kümogo. 2014 küm Tenla kidang sayutsüngiba mapang nung pai Islam yimsü indang jembiba sülen pa anema ken o benok, saka iba ken o nung court-i pa maitsü.

Court nung McConnell anema benoka aliba ken o angadanga mapang nung Ireland nung pei tebilemba jembiba aser religious freedom onük nung o kanga toktepa aruogo.

ANOGO ABEN TSÜNGREM DEN

Mapa nung tim libaliro

"Aser O nung süshia, mapa nung süshia, nenoki kechisa inyakdir, Kibuba Yisu tenüng nung ajak inyakang aser Pa ajanga Tebu Tsüngrem dang tenüngsang agüjang." Kolosi 3:17

Taküm rangben agi kulisüba ya koda tongtipang. "...na kidang mena alidang, aser na lenmang nung jajadang aser na mejangdang aser na shishidang item indang jembidang' (T.Kunem 6:7) iba ya asen chirtem dang Tsüngrem O jembitsü indang ashir saka, iba kasa tesayuba ya aseni asen kulisüba nung amshitet. Hopta tsüngda asenoki temeyoktep nisungtem ajurur aser ghonda timbaka parnok den asenoki alir. Idakji asenoki koma alir iba jagi asenok Khristan taküm ka jenjangji meteter, aseni deobar anogo kata methitemi sentepi oaka, Tsüngrem tenzükba mapa nung mazüngi liaka aseni tanüngba anogotem nung Tsüngrem maden ama inyakra aser lira koda tansütsü ka asütsü.

Yisui sayatenyatem inyakba ajak tebu Tsüngrem sentsüwangshi atema dang inyak aser idangji telokti Pa sülen anidak ta Lai nung asenoki angur. Aseni Khristan ka ama asen inyakba (office, school, college, mapa balala) ajakji inyakra, mamangeri aser tamang tilaria asen dak repranger külen asen Tsüngrem indangji metetnütsü aser sentsüwangshitsü. Ibaji asen nükjidong sädaksüdi.

SARASADEM

Kibuba, kü taküm libaliro, inyaksangshi ajunga agi nü nem sentsüwangshi bener arutsütsü ni yariangma. Amen

Iran nung ozüng tasenba ajanga Khristantem tasüba temerenshi angutsü

July 17, 2021: June 8, 2021 minority tem, talisa nü Iran Parliament nung draft Khristantem anema inyaksü. bill ka agizükogo, aser ibaji Ozüng tasenba benoktsü ozüng kümra tsükchir linüktem, atema committee ka tentettsü talisa US nunger den amalitepa aser iba committee nungji inyakra aser itangitba mapa Intelligence units, inyakra aibelenertem nem Revolutionary Guard Corps tasüba temerenshi obendang aser Army nungi tongti agütsütsü. ketdangsertem shimtsü.

Iran nunger Khristantem Taküm Iran nung Penal densema minority temi Code yanglushiba ajanga tsükchir teloktem den Khristantemi inyakba longjemer inyaker, ta aiben tai mapatem nung tenük tali tonglokja arudar. Anungji bill yoktsü aser Khristantem tasanbaji ozüng kümra kanga reshikangshitsü. Bill Khristan aika nem tasüba tasanba kübok Nasser Navard temerenshi obendang Gol-Tapeh, Ibrahim Firouzi aser Bita Rezaee nunger agütsütsü.

Iba bill ajanga Iran densema Khristan aika nem intelligence ministry nem tashi tasüba temerenshi obendang tulu agütsütsü aser parnokti agütsütsüa akok.

ICC-i India nung Arogo tasen tenzüktsürtem yari

July 17, 2021: Tang India Pastor Jacob ya Karnataka nung coronavirus wara state kübok yimtsüngtem nung mapang nung linük nung Arogo tasen tenzüktsür ka lir. Arogo tenzüktsürtem nem Hindu nationalists aser ICC-i teyari agütsüogo, ta coronavirus wara ajanga tang International Christian par ministry kanga timtemer. Concern (ICC)-i metetdaksü. Wara metenzükdang

Wara mapang nung teyari Hosambpura nung lokti kati pa anguba sülen Pastor Jacob amakba sülen par ministry Venkatesh-i, "International anentsüsa aküm, ibayongji Christian Concern-i yariba tangbo pai tesem melenshia ajanga onoki kanga moaogo. Arogo tasen ka tenzükogo.

Tensa tamajungtiba mapang ka June 23, 2021 nü Pastor nung onoki teyari angur. Onok Jacob densema Arogo tasen kanga timtemba mapang nung tenzüktsür 15 nem ICC-i ita ka teyari anguba ajanga onok peritsüsa chiyungtsü lema kanga pelar," ta metetdaksü. agütsüogo.



Kolkata, July 17, 2021: India nung petrol, diesel aser LPG jenjang maneni atuba anema Honibarnü Kolkata nung Congress party züngsemtemi longkak aitba noksa nung angur.

Petrol, diesel aser LPG jenjang atuba anema Congress-i longkak ait

Patna (Bihar), July 17 (Agencies): India nung gari totzü jenjang maneni atuba anema linük tesem ajaklen Congress party-i sorkar anema anogo ter tashi longkak aita aruba sülen tanü (July 17) tembangogo; yamaji Honibarnü Bihar yimtiba, Patna nunga Congress-i cycle rally ka ayongzüka longkak aitogo. Petrol, diesel aser LPG jenjang maneni atuba aser osettsüset/chiyungtsü nung jenjang kanga atuba anema longkak aitba sentong nung Bihar Congress Tir, Madan Mohan Jha, Bihar AICC in-charge, Bhakt Charan Das, Congress lenirtem- Shakeel Ahmad, Nikhil Kumar, Akhilesh Prasad Singh, Ajeet Kumar

Sharma aser party nung inyakertemi longkak aita Patna nung Boring Road crossing nungi Gandhi Maidan tashi cycle rally agia liasü. Gari totzü jenjang maneni atuba anema RJD-ia July 18 nü longkak aita Bihar nung block ajak nokdangtsü, ta osang angazüker. Bihar nung RJD, Congress aser Left party teloktep opposition lir, aser RJD-i longkak aittsü aliba dak sendakba nung tasüngdangba ka langzüdang Congress Tiri, "July 18 nü RJD-i longkak aitbaji Congress party-ia pusemstsü," ta metetdaksü. Honibarnü Congress-i longkak aitba mapang nung party züngsemtemi Ato

kilonser, Narendra Modi aser Bihar Chief Minister Nitish Kumar na anema yimyim ayim aser karibo LPG cylinder tazüng amer longkak aita liasü. Osangbener den jembidang Das-i, "Linük nung petrol aser diesel jenjang maneni atuba agi linük nung nübur ajak kongshio, ajisüaka temeim maliba Narendra Modi sorkari nüburtem timtemba ola mangashir," ta aitsü. Paisa, International market nung totzü tazü jenjang ajemogo saka Centre sorkar aser state sorkartemi petrol aser diesel nung saru tali agir, ta shisem. Tang Bihar yimtiba, Patna nunga petrol litre ka nung sen 100 dak tema kümogo.

Parliament nung Covid aser totzü jenjang atuba atema jembitsü

New Delhi, July 17 (Agencies): July 19, 2021 nungi tzüngluruwa mongpu Parliament tenzüksü anogo ka lia Amongnü Centre sorkari yimtenren party ajak senden ka ayongzüko. Parliament nung Opposition-i sorkari coronavirus wara anema junga meinyakba aser gari totzü jenjang kanga atuba densema onük aika süoktsü. India nung coronavirus wave tanabuba tenzükba sülenbo tang mezüng Parliament senden amentsü. Honibar nikongdang linük tatong Tir aser Rajya Sabha Chairman, M Venkaiah Naidu-i par kidang yimtenren party balala nungi lenir 40 dak tema jaoka senden ka menogo. Tan hopta tetenzüklen Rajya Sabha nung lenir, Piyush Goyal-ia toaba mapang Ato kilonser aser Congress lenir, Manmohan Singh, Congress lenir Anand Sharma aser NCP tongti, Sharad Pawar nung densema tongti opposition lenirtem den senden mena liasü. Osang angazükba agi, taruba Parliament senden nung sorkari bill tasen 15 benoktsü; iba dak alia Lok Sabha nung bill 4 aser Rajya Sabha nung bill 3 anendaka lir. "Taruba Parliament nung sorkari bill tasen 15 benoktsü, aser item rongnung DNA Technology Bill, Maintenance & Welfare of Parents and Senior Citizens Bill, Assisted Reproductive Technology Bill,

Tribunal Reforms Bill aser Factoring Regulation Amendment Bill densema lir," ta kasa osang ajanga metetdaksü. Centre sorkari Lok Sabha nung bill 23 benoktsü renemogo. Bill 17 tasen asütsü aser bill trokbo tamalen benokba lir aser bill anabo tang aliba bill melentsü atema benoktsü. Sorkari maneni Tribunal Reforms (Rationalisation and Conditions of Service) Bill, 2021 benoktsü; iba bill ya taküim February 13 nü Lok Sabha nung benoka liasü. Lok Sabha nung tamalen benokba aser Standing Committees nem agütsüba bill tem rongnung - DNA Technology (Use and Application) Regulation Bill, 2019; Factoring Regulation (Amendment) Bill, 2020; Assisted Reproductive Technology (Regulation) Bill, 2020 aser Maintenance and Welfare of Parents and Senior Citizens (Amendment) Bill, 2019 densema lir. March 15 nü Rajya Sabha nung National Institutes of Food Technology, Entrepreneurship and Management Bill, 2021 bo agizükogo aser March 17 nü Lok Sabha nunga benoka liasü. Tzüngluruwa mongpu Parliament July 19 nü tenzükba sülen August 13 nü tembangtsü. House anaprong nung anüngdang 11:00 ako nungi nikongdang 6:00 ako tashi senden amentsü.

States aser UTs nem Covid vaccine dose cr. 41.69 agütsüogo: Centre

New Delhi, July 17 (Agencies): Honibarnü Union Health Ministry-i, tang tashi nung states aser union territories nem coronavirus vaccine dose crore 41.69 dak tema agütsüogo aser tang parnok ket nung vaccine dose crore 2.74 dak tema lir, ta metetdaksü. Honibarnep 8:00 ako nung Union Ministry-i, sorkari states/UTs nem vaccine dose ajak senteper 41,69,24,550 agütsüogo aser iba nungjagi tang states, UTs aser nija hospital tem ket nung vaccine

dose 2,74,37,108 anünga lir, ta metetdaksü. Covid-19 vaccination programme tasenba June 21 nü tenzükba liasü aser iba mapatong kübok Centre sorkari arrshi küm 45 ser temapur ajak nem vaccine angati agütsür. India nung ano nisung 38,079 dak coronavirus putetogo aser iba tashidak agi shiranger 560 süogo, ta Honibarnep Health Ministry-i metetdaksü. Tang tashi nung India nung nisung crore 3.1 tema dak coronavirus putetogo aser iba tashidak agi shiranger 4,13,091

süogo. Iba tashidak agi shiranger 3,02,27,792 (shilem 97.31) anepogo aser iba tashidak agi shiranger asüba shilem 1.33 (timba) kümogo. Tang India nung coronavirus agi teshirangdakpur 4,24, 025 dang kümogo aser ibaji coronavirus caseload nungi shilem 1.36 dang lir. Hokolbarnü samples 19,98,715 tendanga liasü aser tang tashi nungbo samples ajak senteper 44,20,21,954 tendangogo, ta ICMR-i metetdaksü.



July 17, 2021 nü Hyderabad nung Telangana State Photo Journalist Association (TSPJA)-i Reuters atema photo journalist, Danish Siddiqui nem akhüm agütsüba noksa nung angur. Pulitzer Award angusang, Danish ya Hokolbarnü Afghanistan nung sepaitem aser Taliban na tsüngda raraba osang bendenba mapang nung asü.

Minister shilem 42 anemabo ozüng alema inyakba ken o benoka lir

New Delhi, Chiteni/July 17 (Agencies): Association for Democratic Reforms (ADR) report ajanga ashiba agi, tang Union Cabinet Minister 78 nungi parnok shilem 42 anemabo ozüng alema inyakba ken otem benoka lir, aser parnok rongnung minister pezü anemabo nisung tepsettsü merangba ken o benoka lir. Tawa Union Cabinet ulushiba/melenshiba mapang nung cabinet minister tasen 15 aser ministers of state tasen 28-i tenangzükba agiba sülen tang minister ajak senteper 78 lir. Minister 33 (shilem 42)-ibo parnok anema ken o benoka aliba election affidavits ajanga pei sasa sangdongogo, ta ADR report ajanga metetdaksü. Minister 24 anema ken o tulu benoka lir, aser item ken o

rongnung nisung tepsetba, tepsettsü merangba aser auyaba ken otem densema lir. Cooch Behar constituency menden nungi Minister of State for Home Affairs tasenba aser Cabinet nung tanubosang, Nisith Pramanik anema nisung tepsetba dak sendakba ken o ka benoka lir, ta ADR report nung shia lir. Nisung tepsettsü merangba dak sendakba nung Minister pezü- John Barla, Pramanik, Pankaj Choudhary aser V Muraleedharan nung anema ken o benoka lir. Minister tem shilem 90 crorepati lir aser minister shia (average) sen crore 16.24 jenjang rongsen lir. Minister pezüibo parnok ket nung sen crore 50 dak tema rongsen aliba sangdongogo.



July 17, 2021 nü Congress Party General Secretary, Priyanka Gandhi Vadra-i Lakhimpur Kheri district kübok Semra Ghaat yimdak rara ajanga takoksa angurtem den jembiba noksa nung angur.

Assad pezübenbuba Syrian tir asütsü tenangzüktepba agiogo



Damascus, Chiteni/July 17 (Agencies): Syria tir mapa abentsü atema Bashar Assad, tang agi bezübenbuba Honibarnü tenangzüktepba agiogo.

May ita election agiba ya anüolen aliba linük aser Assad anemertemi ozüing alema aser taksü mapa ka ta shiogo.

Tir mapa abentsü atema tenangzüktepba agiba sentong ya tir kidang agi, kong clergymen, parliament z ü n g s e m t e m , yimdenyimsürtem aser army officers tem dena liasü.

2000 küm nungi tenzüka Assads-i tir mapa bena arudar aser pai election akoktsü imlaa liasü. Linük nung küm 10 tashi rara adokba ajanga teraksatsüba jenti adoker aliba den rongsenketzüng kanga

mejungi aliba mapang pai iba mapa maneni abentsü.

U.N.-i Syria nunger shilem 80 dak tema poverty line kübok alir ta asatetogo. Syrian currency-a jenjang makai kümogo aser tenügdakba osettem kanga anünga kümogo mesera jenjang kanga tasak kümogo. Linük nung rara tesüngjemba kümogo saka Syria kübok tesem karbo tang tashi sorkari maziüki lir asre bendanger sepai aser telungpurtem linük kübok tesem balala nung yoka lir.

Kasa mapang nung Syria nunger tesadang shi kidanger linük mesera Europe nung oa jenoka lir. Iba rara nung nisung million tesadang ka taküm samaogo aser nisung meyirejang aika samara bushitepba den kiojen aika

raksaogo.

Assad-i 2000 küm tebu Hafez asüba sülen linük tir mapa agizük. 1970 küm Hafez-i anir military-i sorkar atsüing aser iba rara nung nisung taküm aika lalua liasü.

U.S. aser European ketdangsürtemi election agiba yimya ashishiogo aser ashiba agi, election inyakyim ya U.N. resolutions anema aser iba den international monitoring maliba den election nung Syrian nunger ajaki shilem magi.

May ita election nung Assad-i vote 95.1% angu aser ketdangsürtemi ashiba agi vote agütsütsü asoshi züngoksema alir million 18 rongnungi shilem 78.6-i vote agütsüogo. Iba election nung Assada den tetokteper ana liasü.

Afghanistan nung US wadang tamakok nguogo: Russia

Moscow, Chiteni/July 17 (Agencies): Afghanistan nung United States wadang tamakok nguogo ta Russia-i Hokolbarnü ashiba den bendanger sepitem Afghanistan nungi atsüingiba ajanga linük nung tensa tamajungba kümyonga aoer ta tai tongloktsüogo.

Bendanger sepaitem linük nungi atsüingiba mapang Afghanistan nung Taliban purtem kanga tashi ita kümogo aser parnoki district aser arrtsü nung tongtibang tesemtem atsüingiba den province yimtitem sabanga yua lir.

White House-i bendanger sepaitem atsüingiba kanga tebor junga sayuner, ta Russian Foreign Minister Sergei Lavrov-i Hokolbarnü ashi.

"Ajisüaka wadang tamakok anguba ajaki angateter," ta pai Uzbekistan nung conference ka nung shilem agiba mapang osangbenertem dang ashi.

Lavrov-i, US aser NATO sepaitem kanga aritepa atsüingiba aitsüogo aser iba ajanga Afghanistan nung security jenjang kanga mejungi kümogo ta ashiba den kidanger linüktem nunga iba ya prokshia

aotsü ta tekümdaktsü metetdaktsüogo.

Russia-i taoba hopta Taliban lenirtem Moscow-i jaokogo, kong telungpurtemi ashiba agi, parnoki Afghanistan shilem 85 amokbangogo.

Moscow-i Taliban purtejakleni aoba kanga kümdanga meita atadar aser Russia indang military base tem amenoka aliba ex-Soviet Central Asian linüktem iba ajanga kongshitsü akok ta bilemer.

Lavrov-isa, mepetmesü tali kümogo aser kiralongrar inyakyim aser temesepba mozü shibelenba tali kümogo, ta ashi.

Iba hopta tetenzüklen Tajikistan-i, Afghan nunger refugee 350 shi par litsü adena jena aruba metetdaktsüogo.

Tajikistan tir Emomali Rakhmon-i Hokolbarnü border guard posts asadangogo aser Afghanistan den arrtsüi sepai talila 20,000 yokogo.

Russia defence ministry-i iba hopt ashiba agi, parnoki Tajikistan nung military drills ayongzüka agiogo, kong Afghanistan den arrtsü nung security akangshitsü atema parnoki base ka amenoka lir.

France-i vaccine agir alir senzüsenpongertem aitdaktsütsü

Paris, Chiteni/July 17 (Agencies): COVID-19 tashidak menatepa aoba nokdangtsü atema France-i maneni linük kar nungi vaccine magi aliba senzüsenpongertem nem tenokdangba agütsütsü, ajisüaka Vaccine dose anaprongla agir alirtem linüki aittsü melatsü, ta Ato Kilonser Jean Castex-i Honibarnü ashi.

France nung tang coronavirus tashidak menar aika küma aoba den tir Emmanuel Macron-i linük akhi ama jenjang ka nung nokdaktetsü atema vaccine agiba ajanga dang tashidak nokdangtetsü ta shia lisopurtem vaccine agitsü atema ajungshiba mapang ka nung tang iba jenjang agiogo.

July 18, Deobarnü nungi tenzüka United Kingdom, Spain, Portugal, Cyprus, Netherlands aser Greece nungi vaccine magi aliba senzüsenpongertemi France-i arutsü lia ghonda 24 tsüingda COVID-19 tashidak tendangba kuli sayutsü nüngdaker.

Tang UK nungi arurtem ghonda 48 tsüingda tashidak tendangba aser tanga linüktem nungi arurtem ghonda 72 tsüingda tashidak tendangba kuli sayutsü nüngdaker.

Britain-i Hokolbarnü Fracne nungi arurtem maneni



Paris nung Eiffel Tower semdangertemi mitsa kolak nungi alima penzüba noksa nung angur. Ita teku sülen Hokolbarnü nungi Eiffel Tower lapoktsüogo. Taoba küm October ita France nung coronavirus wara tanaben poktetshiba mapang Eiffel Tower ya shibangtsü atema tetuyuba agüja liasü.

quarantine asütsü asoshi telemtetba agiba sülen Castex-i iba osang sangdonga liasü.

Britain nung tang tenokdangba balala agütsür aliba ya Hombarnü nungi salatsütsü lateter lir, ajisüaka ken o ano mejangja.

Honibarnü nungi tenzüka linük mashika nungi France-i aruru shirnok vaccine agir lir, parnok dak tashidak metendangtsü, ta Castex-i ashi. "Vaccine agiba ajanga tashidak nungi jenboa aliba aser talisa Delta variant nokdangtetba jangjaogo, anungji European Medicines Agency-i

agizüker aliba vaccine (Pfizer, Moderna, AstraZeneca or Janssen) ajunga agir alirtem Honibarnü, July 17 nü nungi tenzüka linük mashika nungi arutetsü," ta pai ashi.

Tunisia, Mozambique, Cuba aser Indonesia nungi senzüsenpongertemi parnok senzüsenpongba kuli agütsütsü nüngdaker aser iba den par linük toktsür mao tsüingda COVID-19 tashidak tendangba negative result sayutsüla aser ano France tonga aruba sülena anogo 10 quarantine asütsü. Parnok "red list" nung aliba linüktem rongnung züngoksemogo, aser

item linüktem nema kasa tetuyuba agüja lir.

April ita tom tashi nung anogoshia nisung 42,000 dak tashidak poteta aliba nungi June ita tatem tashi nung anogoshia nisung 2,000 tekübok dak dang tashidak potetba sülen France nung ano tang asendenshir tashidak prokshia odar aser anogo nung nisung 11,000 shidak tashidak poteta arudar.

Kasa mapang nung France-i India nung yangluba Covishield, AstraZeneca vaccine agir alirtema Deobarnü nungi tenzüka kecha tetsükdaktsü makai aitdaktsütsü

asoshi telemtetba agiogo.

Europe nung yangluba AstraZeneca vaccine atema dang European Unions-i COVID-19 certificate agütsüba dak sendakba nung ola adokba sülen, India kübok Serum Institute nung yangluba AstraZeneca indang vaccine agir alir senzüsenpongertem agizüktsü atema telemtetba agia liasü.

EU linüktem aikati India nung yangluba vaccine agizükogo, koba UK aser Africa nung linük balala nung amshidar. Linük balala nung teteyuba aser tenokdangba balala agütsür aliba ajanga senzüsenpongtsü nung tetsükdaktsü aika adoker.

Tang tashi nung France-i China mesera Russia nung yangluba vaccine magizüker aser EU drug regulator-i temelaba agütsü aliba vaccine agir alirtem dang linüki aittsü melar.

EU drug regulator-i agizüker aliba Covid-19 vaccine tem rongnung Pfizer/BioNTech, Moderna, Johnson&Johnson aser AstraZeneca vaccine densema lir.

France nung tang tashi nung Coronavirus tashidak agi nisung 5,844,249 tongogo aser nisung 111,451 süogo. Kasa mapang nung tashidak menar nisung 5,162,757 bo taneptsü nguogo.

Kohima Village nung training ka agiogo



Kohima, Chiteni/July 17, 2021: Christ King Church, Kohima village nung, Covid tashidak agi asüba mang aneplautsü (Dead Body Management) atema training agiba mapang, Dy. CMO, H&FW, Dr. Khriesilie Sachii aser par team den volunteer temi PPE kit semokba aser semzükba yimyatem sayuba yangi noksa nung angur.

Kohima, Chiteni/July 17, 2021 (TYO): District Task Force Kohima den Kohima Village Task Force aser Health & Family Welfare Department longjemer, Honibarnü (17.07.2021) Christ King Church, Kohima village nung 'Dead Body Management' (Tasü mang aneplaba yimyatem) nung training ka ayonga agiogo, ta sangdong ajanga metetdaksü.

Iba sentong nung shisalen sayur, Dy. CMO, H&FW, Dr. Khriesilie Sachii-i, COVID-19 tashidak agi asüba tasü mang aneplaba yimyatem indang tetuyubatem rasa ashi, koba Directorate of Health and Family Welfare, Nagaland ajanga agüja liasü; aser tekümdangtsü meratem nung

manidakra, tasü mang (Covid agi asür) ka nungi Covid tashidak menatsü lendong lir, ta pai ashi.

Dr. Sachii-i, healthcare Institution nung tasü mang ka aneplaba aser leper nung mang aremdang/rongdok dang inyakyimtem indang telok dang metetdakja liasü.

Kidang/telok nung covid agi asürtem mang aneplautsü asoshi, tekümdangtsü meratem nung anidaka aneplurtemi tasü mang aneplautsü atema, agüja aliba tetuyubatem talilatem pai tongmelang agi metetdaksü.

Lockdown mesüra senzusenbongtsü asoshi tenokdangba agütsür aliba mapang, asür adianu, kinunger aser medemer tem asüpila sentong nung adentsü asoshi,

pei pei tesem nung district task force temelaba agitsüla aser teti Covid-19 tetuyuba nung anidaksüla, ta pai ashi.

Covid-19 agi asürtem bendanga mamshitsüla aser iba wara agi shiranger kibong tem mezüngmeshi masütsüla. Asür nem tetushi agütsütsüla aser tim yimya nung anidaka, asür adianutemi pa /la (asür) nem aküm agütsütsü asoshi melatsüla, ta pai shisem.

Tang ama tensa tamajungdang, nübur atema bilenja meranga inyakba atema, Kohima Village Council Chairman, Helievi-o Solo-i Kohima village volunteers aser Kohima village scouts & guides dang pelaba metetdaksü.

State nung iba wara azioktsü asoshi maparen balala inyakba atema Sorkar dang pai pelaba shisem. Iba wara anema raratsü asoshi, yimtsüng nung nübur ajaki amalitepa inyaktüla, ta pai ashi aser iba training amajok mekümdangtsütsü asoshi training mapang temulung agüja angazütsü asoshi pai training agirtem ayongzük.

Maneni, iba training tetenzüklen, Convenor VTF, Dr. Khriesialie Yhome-i, yimtsüng nung Covid-19 agi asürtem aneplabu yimya indang tongtibangtem metetdaksü. Iba sülen, MO Botsa, Dr. Atsei-ii Yhome aser lar team-i personal protective equipment (PPE) kit semokba aser semzükba yimyatem training agirtem dang sayua liasü, ta kasa sangdong nung shia lir.

MULUNGNEN O



ASO:
18/07/1933

ASÜ:
10/07/2021

Asür Yongdangnaro (Khar)

Onoki teti meima aliba ojala iba lima toktsür teti tatembang makaba limai aoba anogo nung asen tendak tetsübuttsü tesashi wara liaka shirnokisa nübo, rongsen, shisatsü aser sarasadem agi yaria aruogo, nenok ajak dang kanga pelaba lemsateper.

Tsüngremi nenok temeim mapa tajung asoshi moshia moajangma.

Temeim Chirnur, Anükapang, Semchirtem aser Kinungertem.

"The Sympathizer" nung Robert Downey Jr denogo



New Delhi, Chiteni/July 17, 2021 (Agencies): Kaket zülur Viet Thanh Nguyen indang 'Pulitzer Prize' takok anguba novel "The

Sympathizer" nung ajemdaker yanglutsü aliba series atema, Hollywood star Robert Downey Jr anisemogo.

Iba series ya HBO atema entertainment company - A24 ajanga yanglutsü.

"Avengers: Endgame" nung Iron Man -Tony Stark ama tesüsa shilem agir sülen, iba series ya Downey Jr indang mezüng project asütsü.

Variety sangdong ajanga angazükba agi, "Old Boy" yanglutsü Park Chan-wook-i iba drama series direct asütsü. Kasa mapang, Park-i co-showrunner ama Don McKellar den longjemer inyaktü.

Iba series ya Los Angeles aser Vietnam tesem balala nung tangoktsü sentong lir.

Film yanglurtemi Robert indang character/role dak sendakba nung osang tejangja magütsü, saka tanünga cast ajak Vietnam nung asütsü.

Robert-i shilem agiba dak alia executive producer ama iba series nung inyaktü aser pai supporting role balala nung shilem agitsü.

"Nguyen indang otsü nung ajemdaker inyaktü asoshi team tajung ka den inyaktü kanga tongtibang. Director Park, producer Susan aser Team Downey den longjemer takok ngua maparen achayangtsü tebilemba lir," ta actor-producer-i ashi.

Maneni, iba series atema tanga executive producer temji Chan-wook, McKellar, Kim Ly, Rhombus Media indang Niv Fichman aser Team Downey indang Amanda Burrell aser Susan Downey nung asütsü.

N-IsF mapadong kübok Kikheto Sema-i Boke Botsa semdang



Kohima, Chiteni/July 17, 2021: Boke Botsa nung 'Naga Model Integrated Settled Farming' semdangba mapang, APC, Y. Kikheto Sema, IAS-i ayi atsüba kol tila kati tzülu nung ayitem atsüdokba yangi noksa nung angur.

Kohima, Chiteni/July 17, 2021 (TYO): Naga Model Integrated Settled Farming kübok maparen achayangtsü inyaktü aser rebrangshimtsü asoshi, Honibarnü (17.07.2021) APC, Y. Kikheto Sema, IAS-i anir working committee-i Boke Botsa semdanga liasü, ta sangdong ka ajanga metetdaksü.

N-IsF kübok, agri aser teloktep department ajak ka küma longjemer inyaker, kong aluyimertem aluyimba aser iba dak sendakba tanga maparen tem maneni inyaktü asoshi parnok nem teyari agütsütsü.

Yimtsüng nung alirtem atema, iba model ya tajangzük aketha mapatong ka kümsütsü nükla

yur inyaker. Kasa mapang, parnok (aluyimer) süngolemba/süngianglijang züsente tanga talilatem market nung yoktetsü akok aser ibaji ajanga parnok rongsekettsüng nung ajungkettsü.

Kikheto-i, state nung mapang talangka tsüngsarusa/tzünglu junga maruba ajanga aluyimba wadang nung kanga mejungi kongshio. Ajisüaka, Boke-Botsa nung ayong aliba ajanga alu maparen junga inyaka aoer aser iba tesem nung tzü agi anünga/mepiriba timtembo mali," ta aluyimer dang metetdaksü.

Tzü mopung melenshiba talisa tsüngsarusa mesüra tzünglu kanga aruba ajanga tzü

metsüngbanga atuba tem nokdangtsü/ajemdangtsütsü atema, APC, Kikheto-i yimertem aser aluyimertem dang arem wazüka ayutsü asoshi ayongzük.

Department den amalitepa inyakba atema, Boke-Botsa nung alir aluyimer kibong ajak dang Kikheto-i pelaba metetdaksü aser kaa ita peria alitsü asoshi maneni meranga inyaktü asoshi pai aluyimertem ajungshia liasü. Sorkar dak dang memetaloki, pei sasa tasa balala atongtetta inyaktü aser tangara ajangzükdangtsütsü inyaktüla, ta pai aluyimertem ayongzük.

Nagaland nung, PM-KISAN scheme kübok aluyimer lakh 2.00 shi ajangzükogo aser Centre Sorkar ajanga aluyimer bank account nung indang indanga sen cr. 251.75 tashi inoktsüogo, ta pai metetdaksü.

Centre ajanga yokba sen ya tim masüba nung meindoki, aluyimba wadang tsütsü nüngdakbatem peridangtsütsü asoshi ochishia amshitsüla, ta aluyimertem dang pai tetuyuba agütsü.

Yimtsüng nung tzü mopung aser ali den apet maparen balala atongtetta inyaktü asoshi pai Putu menden aser aluyimertem ayongzük liasü. MGNREGA kübok Department of Rural Development indang scheme den külemi, tsübo talila mesemtettsü, dam tem yanglutsü aser aluyimba dak sendakba nung tanga maparen nung rangloker inyaktü asoshi

VDBs aser Putu Menden nati asalentong yanglutsüla, ta pai ayongzük.

Aluyimba wadang nung tajangzük angutsü asoshi, Sorkar ajanga agütsüba facility tem tajungtiba nung ketdangtsü amshitsü asoshi pai yimertem ayongzük aser Boke-Botsa indang 'Naga Model integrated settled farming' ya tanga district nung alir nüburtem atema tatishitsü asütsüsa meranga inyaktüla, ta Kikheto-i yimertem ajungmesogo.

Kasa mapang, Kikheto-i, lanurtem dang community farming/contract farming inyaktüla aser tang ama tensa tamajungdang, Tsüngrem dang shisatsü aser Pa leniba meshia sarasadema alitsü asoshi ayongzük liasü.

Maneni, N-IFS Boke Botsa indang Working Team züngsemtemi bendanga agüja aser meranga inyakba atema, Kikheto-i parnok dang pelaba metetdaksü. Iba project takok ngura, state kübok tanga district nunga kasa mapatong tenzüktsü sentong lir, ta pai ashi.

Iba working committee züngsem rongnung Agriculture, Fisheries, Sericulture, soil & water conservation aser Animal husbandry nungi züngsemtem dena lir. Kikheto-i ani working committee-i Boke Botsa nung piggy farm, Mini soil plant, fishery pond, coffee plantation aser tzülu tem semdanga liasü, ta kasa sangdong nung shia lir.

T20I: West Indies-i Australia madak 4-1 agi series kokogo

St Lucia, Chiteni/July 17, 2021 (Agencies): West Indies aser Australia na tsünga T20I series final asaya nung, West Indies-i run 16 agi Australia kokogo. Iba asaya nung West Indies nungi batsman Evin Lewis-i run 79 yanglua liasü.

Daren Sammy Stadium, St Lucia nung final asayaba mapang, Lewis-i ball 34 nung run 79 yanglutet. Pai 6' tuku aser 4' pezü zükloksü aser over 20 nung par teloki run 199/8 yanglua liasü. Caribbean team-i 4-1 agi iba series takok anguba den külemi, Lewis-i "Man of the Match" award angu.

Fast bowler Sheldon Cottrell aser Andre Russell nati wicket asemsem agi. Kasa mapang, tesemdanger team - Australia-i over 20 nung run 183 dang yanglutet aser wicket 9 out süadok.

Australia nunger Mitchell

Marsh, shibai series nung asaya 4 nungi half century 3 tashi yanglu, final nunga pai junga asaya tenzük, saka ball 15 nung run 30 yanglur alidang Russell-i pa out sütsü.

Australia captain Aaron Finch temang nung liaka, pai anir team-i meranga asayaogo. Ajisiaka, pai run 34 yanglur lia over 10buba nung Hayden Walsh-i aonba ball ka nung pai zükloksü merang, saka junga mezükshiba ajanga ball tom nung lia long-on tsütsü Fabian Allen-i ball puzüka pa out sütsü. Iba sülen, Australia team pur timtema asaya.

"Pai (Allen) iba ball apuba yong onok atema asaya nung temelenshi adokdaksü," ta captain Nicholas Pooran-i ashi.

"Iba series koktetba ya team atema takok tuluka asütsü. Hayden Walsh danga pelaba shisemer. Pa nem lemzükstüba shilem bendanga agütsür

inyaker aser T20 cricket nung leg-spinner temi tongti shilem agiba ajaki jangjaa lir," ta Pooran-i ashi.

Antigua nungi leg-spinner Walsh-i iba series-asaya pungo nung wicket 12 agiba arema, pa nem "Man of the Series" award agütsü. Walsh-i wicket kati New Zealand spinner Ish Sodhi indang T20I series record memenep lir. Taküm küm tetenzüklen, Australia den T20I series asayaba mapang Sodhi-i wicket 13 tashi agiogo.

Iba final asaya nung, Chris Gayle-i wicket ka danga magi, saka pa nem lemzükstüba over 3 nung pai Australia team nem run 9 dang agütsü.

Pakistan tem den asaya pungo series ka masayadang, taruba Mongolbarnü nungi Barbados nung, West Indies aser Australia na One-Day International asaya asem tenzükstü.

Tokyo Olympics nung asayatsü: Djokovic



New Delhi, Chiteni/July 17, 2021 (Agencies): World no. 1 Novak Djokovic-i, tebur asayar kati mezüng calendar Golden Slam jenjang ajangzükettsü maongka kü nem agütsü asünung, Tokyo Olympics nung asayatsü, ta ashi.

"Tokyo atema tayimtsü mekaa yuogo aser Olympics atema külem #TeamSerbia den adentsü," ta Twitter ajanga Djokovic-i lemsatop.

"Kanga dang yonyaseta Tokyo atema renemdar aser Olympic asayamung nung medal takok angutsü asoshi national team pur den longjemer asayatsü. Serbia atema teti dang pelaa asaya aruogo aser taruba asayamung (Olympics) nunga ajak peladaksütsü asoshi tajungtiba asayatsü," ta Djokovic-i ashi.

Taküm, arishi küm 34 tain Djokovic-i Australian Open, French Open aser Wimbledon title takok nguogo.

Golden Grand Slam jenjang ajangzüketter tebur rongnung mezüng akümtsü atema, Djokovic-i Olympic nung gold medal aser US Open takok angutsüla.

Tetsür tennis nungang, iba calendar Golden Slam khen takok ngua lir. Germany tsür Steffi Graf-i tongtibang asayamung pezüprongla aser 1988 küm Seoul nung Olympic gold takok anguba mapang, lai Golden Slam jenjang ajangzüketteta lir.

Serena Williams, Rafael Nadal aser Andre Agassi nungeri 'Career Golden Slams' takok ngudanga lir.

Tennis star Roger Federer aser Rafael Nadal nati iba Olympics nung shilem magitsü telemteba agidoker asünung, Tokyo Games nung Djokovic-i gold medal takok angutsü teimla lir. Ano külen, US Open champion Dominic Thiem-a iba asayamung nungi tukuogo.

2008 küm, Beijing Olympics nung, tebur kija tennis asaya nung Djokovic-i bronze medal takok angu. Iba asayamung nung jenjang tasembuba atema, America nunger James Blake makokdang, semifinal nung Nadal-i Djokovic tsükdaksü.

2012 London Games lapokba sentong nung, Djokovic-i Serbia indang wako amer shilem agi, saka semi-

final nung pai Andy Murray makok. Iba sülen, Bronze medal asaya nung, Juan Martin del Potro-i Djokovic-i tsükdaksü. Küm pezü sülen, Rio Olympics - tennis asayamung tebur kija mezüng round nung, Del Potro-i Djokovic madak takok angu.

Aruya aliba Games nung shilem agitsü asoshi telemteba ka magiteti aruba sülen, anogo pezü lir Djokovic-i iba asayamung nung shilem agitsü osang tejangja sangoktsüogo.

Deobarnü (11.07.2021) Wimbledon title trokbuba aser 20buba Grand Slam takok korang atema Matteo Berrettini madak takok ngur sülen, Djokovic-i iba asayamung nung shilem agitsü asoshi telemteba ka magi liasü, ta ashi.

Iba Games atema asaya tesem ajak nung tereprangertem madentsü. Tokyo nung Covid-19 tensa mejungi küma aoba asadanteta, asayamung ayongertemi iba mera agir.

Olympics - tennis asayamung nung, tetsür asayar rongnung Serena Williams, Victoria Azarenka, Angelique Kerber aser Bianca Andreescu nunger shilem agiba mangutsü.

Kasa asayamung nung, tebur asayar rongnung, British nunger Dan Evans, Australia nungi Nick Kyrgios, David Goffin (Belgium) aser Canada nunger Milos Raonic aser Vasek Pospisil nati shilem magitsü.

AS Roma-i goalkeeper Rui Patricio alizükogo


Chiteni/July 17, 2021 (Agencies): Serie A club AS Roma-i Premier League club Wolverhampton Wanderers nungi goalkeeper Rui Patricio alizükogo, ta club sangdong ka ajanga Mongolbarnü metetdaksü. AS Roma-i pa euro million 11.5 agi alizükogo.

Portugal nunger international asayar ya Wolves indang No.1 goal keeper liasü aser küm asem asayaba mapang pa Premier League asaya ana nung dang masaya aser asaya 37 tashi goal ka danga midaksü nokdak. Pa Portugal indang Euro 2020 squad nunga densema liasü, shirnok last-16 nung tsüka liasü.

Taoba season Roma pur jenjang tenetbuba nung tembang aser taruba season atema parnoki Spurs coach Jose Mourinho alizükogo. Patricio-i ashiba agi, pa Mourinho kübok asayatsü atema yongyaa atar.

"Jose Mourinho ya alima nung coach tajungtiba rongnung ka lir aser ni pa kübok asayatsü aser team nem takokba tashi teyari agütsütsü yongyaa atar," ta pai ashi.

Jenjang tenetbuba nung



season ana tembangba sülen Wolves pur taoba season jenjang 13buba nung tembang aser manager Nuno Espirito Santo-a season tembangba sülen Tottenham Hotspur-i ogo.

"Club puti otsü nung tajungtiba asayaba mapang Patricio-i shilem agiogo. Onok EPL-i ailti pa aru aser club jenjang tenetbuba nung anaben tashi tembangba nung pai teyari agütsüogo," ta Wolves technical director Scott Sellars-i ashi.

"Pai club kanga junga tenzükogo, ajisiaka pa club tasen aser league tasen nung asayaba ajanga tajangshiba tasen angutsü aser ajak atema tajangzük asütsü," ta paisa ashi.

India Shooting team Tokyo tongogo; Hombar nungi training tenzüktsü

New Delhi, Chiteni/July 17, 2021 (Agencies): Aruya aliba Tokyo Olympics, koba July 23 nungi tenzüka asayatsü lir, iba asayamung nung shilem agitsü atema, India shooting team pur Honibarnü Tokyo tongogo.

COVID-19 tendangtsü atema India shooting contingent' indang sample bendenogo aser osang atadar. Hokolbarnü, Tokyo 2020 atema India shooting contingent Zagreb, Croatia nungi Amsterdam tonga ao. India shooting squad nung Saurabh Choudhary, Abhishek Verma, Aishwary Pratap Singh Tomar aser Anjum Moudgil nungeri anir asayatsü. New Delhi aser Croatia kübok ayongba ISSF World Cup asayamung nung India team-i medal balala takok angu.

Croatia nung team nungi asayar ishikati dang shilem agi asünung, New Delhi nung anguba ama Croatia asayamung nung parnoki medal aika mengutet. New Delhi kübok ayongba asayamung nung India nunger shooter 52 agi shilem agia liasü, saka Croatia nungbo shooter 14 agi shilem agi.

Tokyo 2020 atema Indian shooting squad nung Deepak Kumar, Divyansh Singh Panwar, Sanjeev Rajput, Aishwary Pratap Singh Tomar, Saurabh Chaudhary, Abhishek Verma,

Angad Vir Singh Bajwa, Mairaj Ahmad Khan, Apurvi Chandela, Elavenil Valarivan, Anjum Moudgil, Tejaswini Sawant, Manu Bhaker, Yashaswini Singh Deswal aser Rahi Sarnobat nunger dena lir.

Sangdong ajanga angazükba agi, India shooting team quarantine masütsü aser parnok Hombar (19.07.2021) nungi training tenzüktsü asoshi melaogo. Iba shooting asayamung ya Asaka Shooting Range nung asayatsü, koba north west Tokyo tsütsü Saitama Prefecture nung lapoka lir. Iba tesem nungsa 1964 Olympics - shooting tetoktepa ayonga asayaogo.

Ano külen, Deepika Kumari aser Atanu Das nati anir India archery team pur Olympic Games nung shilem agitsü atema Tokyo-i ogo.

"Tokyo-i ayamesoa ogo. Ayong ayonga senzütettsüsa tang iba maongka mezüng angur. @Media_SAI @Anurag_Office @KirenRijju @PMOIndia dang kanga pelaba metetdaksür," Twitter ajanga Atanu Das-i lemsatop.

Tokyo Olympics atema, India nungi saispong 18 nung shilem agitsü asoshi athlete 126 shi aotsü sentong lir. Taoba dang nungi tan Olympics nung India contingent tuluba asütsü.

BILEMDANGANG

"Teshisadangba mekai inyakdang aiben takoksa ajurur."